

# Reinié SAVOYE

## AU MURMUR DE MI PIN

Pouèmo Prouvençau



*Es dedicado aquesto garbeto à moun segne Paire Marius SAVOIO,  
Felibre de la Flourdalis, 1870-1939.*

### PER L'AMI REINIE SAVOIO

Moun cor es plen de joio,  
Encuei souto l'autin,  
En escoutant, Savoio,  
Lou murmur de ti pin.

Tout ço qu'as vist e cantes  
Parié l'ai couneigu.  
Lou retrove, e m'encantes,  
Dins ti vers bèn adu:

L'amanèu di flour blanco  
Qu'en plen mes de janvié  
Fai signau sus li branco  
De nòstis amelié.

Lou vióulet di vióuleto  
Au cagnard di canié,  
Lou crid di dindouleto  
E l'oulour di vióulié,

La primo que trantraio  
E que pamens flouris,  
Lou blad que saup la daio  
E que pamens trachis,

Lis eissame d'abiho  
Au mèu di roumanin,  
Li clapiho d'Aupiho  
E lou murmur di pin,

L'espantamen di sorgo  
Dins l'amarun di bouis,  
Lou verai, li fatorgo,  
La pas e li emboui,

Lou champ que se travaio  
Dins lou fres dóu matin,  
Li fedo, la cabraio  
E lou japa di chin,

La terro que se trisso,  
La reio, lou coutrié,  
Li magnan, li canisso,  
La fueio d'amourié,

L'enfant dóu mas qu'escouto  
Se canto lou couguiéu,  
Li grihet dins li mouto  
I calabrun d'estiéu,

Li vigno soufatado  
E li gres futura,  
Li lèio di plantado,  
Lis estiéu artura,

Lou bacèu d'un cop d'alo  
D'un vòu de perdigau,  
La raisso di cigalo,  
Lou crussi d'un caiau,

Lou pastre que gouverno  
Soun escabot d'avé  
Dins un champ de luserno,  
Dins l'òrdi e l'esparset,

Li figo e li mióugrano  
Qu'eron pèr lis enfant,  
Li panié d'avelano,  
Li nose de Sant-Jan,

Li canestèu d'óulivo  
Culi dins li vergié,  
L'òli que recalivo  
Lou lume e lou mourtie,

Lis ivèr de cisampo  
Dins li mato d'avaus  
Mounte lou gèu escampo  
Lou rouvi d'un rigau,

La journado acoumplido,  
La gau de retrouva  
La mouié, la bastido,  
Loun bonur bèn sarra,

Li joio de la taulo,  
Lou vin, lou pan, la sau,  
La man sus la cadaulo  
Dis ami que fan gau,

Li gais acamp de festo,  
Sant-Marc e soun cabrit,  
Sant-Aloi que s'aprèsto  
E fai peta lou foulit,

Sant-Laurèns que s'estouno  
Dóu grasihas d'avoust,  
Li vendèmi d'autouno  
E soun mourre de moust,

Li bòni regalido  
Di vihado d'ivèr,  
Li castagno roustido,  
Li conte, li vièis èr,

Li sounge, li desaire,  
Li camin qu'avèn fa,  
Ço qu'aurian vougu faire,  
Tout ço que faren pas...

En cantant, car Savoio,  
Alin, dins Lamanoun,  
Veses coume ma joio  
A toun cant fai ressoun.

Es que nòstis Aupiho  
Porton li meme pin,  
Meme eissame d'abiho  
E meme roumanin.

Boufe o noun la cisampo,  
Abiho o troubadour,  
Lou meme mèu s'acampo  
En trevant mèmi flour.

Eigaliero, lou 15 de jun de 1977.  
Charles GALTIER.

## LINDAU

Estent pau jougadou e gaire cafetié,  
Emai prengue plesi au bacèu dis estanco,  
Vite las d'ista dre à bada la petanco,  
Subretout quand i'a trop de court e de coustié;

Desempièi proun de tèms ai pres pèr abitudo,  
En douço coumpanié de dono soulitudo,  
Me tirant à despart, d'enrega lou camin  
Que mounto dins la colo, à l'oumbrino di pin;

E lande dins Calès, l'antico ciéuta morto  
Qu'esound tant de secret embarra dins si porto;  
Calès, que li Ligour, nòsti vièi davancié,  
Iécavèron, antan, sis oustau roucassié;

Alor, lou cabedèu di siècle transitòri  
Debanant davan iéu quatre milo an d'istòri,  
Sente dintre moun cor pica lou batedis  
Que fai à la chut-chut l'amo de moun païs;

E quand, i ventoulet alenant dis Aupiho,  
Li grand pin manounen boulegon si mantihoo,  
Oublidant tout-d'un-tèms lagno, soucit, charpin,  
Acorde mi pantai au murmur de mi pin.

## BELLO DE JUN

Sus lou lindau de la bastido,  
Pausadis e countemplatiéu,  
Vese veni, d'argènt vestido,  
La proumiero niue de l'estiéu;

Soun raro e palo lis estello;  
De Roco-Roussu, vers Seloun,  
De tout soun flar, la luno bello  
Nego li mourre e li valoun.

Gardian de granjo alin perdudo  
En quauque rode dóu trescamp,  
Dins l'amplour de la soulitudo  
Se respond lou japa di can.

Mai, au contro, sus la grand-routo,  
Dóu gros trafé, l'esbrandamen  
Que tout-esca l'emplissié tutto,  
Vai d'à-cha-pau à mourimen.

Repepio sa cansouneto,  
Dins sa cauno, lou grihet brun;  
Souto li mento, uno luseto  
Esbrihaudo un caire d'oumbrun;

Pèr l'asco d'uno martelièro  
La fiholo escampo de plour;  
Dóu jardin, talo uno preguièro,  
Mounto vers Diéu l'amo di flour;

Un ventoulet clino li broundo;  
Dintre la ramo di tihòu,  
Alegre e pur, dins la niue bloundo  
Gisclo lou cant d'un roussignòu.

Coume sian bèn sus la terrasso  
A pantaia l'ouro que passo...  
Mai fau pas faire li testard,  
Passo tant vite... se fai tard;

Noste clouchié comto younge ouro,  
D'un aise grave e tranquilas,  
A soun reloge vièi e las;  
Contro l'autin la rosó flouro;

Sus moun coutet, sente, beisaire,  
L'alén tant pur de soun vierjun;  
— Te dise à deman, me vau jaire,  
Fiho bello dóu mes de jun.

Vau estrema dins la bastido  
Lou remembre countemplatiéu,  
D'uno niue, de luno flourido,  
Bello proumiero de l'estiéu.

## SOLITUDO

Au brusi de si cimbaletó,  
Umble soulisto, un grihet brun,  
Encanto de sa voues naneto,  
La douço pas dóu calabrun.

A soun escouto, la luseto,  
De soun asclo se tirant lèu,  
Vèn au lindau faire pauseto  
A la lusour de soun calèu.

En cant d'amour e d'alegrìo,  
Musico lindo s'envoulant,  
Lou roussignòu mando si triho  
Vers l'esplendour de l'estelan.

Mai lou tèms fuso... la machoto,  
D'un chioula morne e plagnitiéu,  
Nous semblo dire, proun bachoto:  
— Perqué tant lèu s'en vai l'estiéu?

L'ivèr s'acampo; dins lis erme  
E sus lis ort pestelo ferme;

A nosto vitro, que fai gau,  
Soulet toujour, vèn lou rigau.

Coume l'auceloun dins sa tousco,  
Coume l'insèite pèr campas,  
Souvènti fes l'ome es en bousco  
De soulitudo emai de pas.

Un jour que pèr champ m'esmarave  
Liuen dóu van bram, me demandave:  
D'estre soulet, quete resoun  
N'en esplicavo lou besoun?

Quand rescountrant lou pastre Alàri,  
Que, franc si chin e soun bestiàri,  
Tambèn vanego proun soulet,  
Me l'a fournido risoulet;

Que m'a di: — Dono Soulitudo,  
Dins lis embaradou charmant  
D'uno amourouso esclavitude,  
Retèn, jalouse, sis amant.

## MEDAIO GRECO

Pichoto medaio argentino  
Qu'atrouvère un matin d'avoust,  
Agouloupado de patino,  
Dessus lou baus de Santo-Crous,

Pichoto medaio argentino  
Que dourmiés dempièi douz milo an,  
Siés-ti grèco, siés-ti latino?  
Me demandave en te campant;

Bèn counservado e neto qu'ères  
Emé gentun respondeguères;  
— N'as pas legi lou mot que i'a  
Sus moun revès?: Massalia.

Mai, de l'ufanouso Marsiho,  
Que tant luen vogo soun renoum,  
Se n'aviés pas, menudo fiho,  
Tant claramen pourta lou noum,

L'auriéu vist qu'ères marsiheso,  
Dóu soulèu d'avoust, li raioun,  
Fasènt briha soutu la greso,  
La como noblo dóu Lioun;

L'auriéu vist au bel encapage  
De man de mèstre cisela;  
L'auriéu vist au divin carage  
Pèr Fidias escrincela;

L'auriéu vist au coutet gracie,  
A la bouqueto que souris,  
Au front pur, au regard sutile  
D'Artemiso la Cassairis.

Pichoto medaio argentino  
Atrouvado un matin d'avoust,  
Agouloupado de patino,  
Subre lou baus de Santo-Crous,

Gèu, terro-tremo emai aurasso  
An cabussa li muraiasso  
De Santo-Crous; soun castelas  
Aumont derruno, vièi e las...

Tu, pèr lou dòrmi repausado,  
Semblo d'aièr toun encapado;  
De toun metau lou clar tintin  
A garda tout soun argentin.

Rèston risènt medaio e buste,  
Sout lou derroui de la ciéuta;  
La belugo de l'Art aguste  
Inmortaliso la Bèuta.

## MIREIO INMOURTALO

Iéu sabe un libre sobre-bèu,  
Di grand pouèmo lou flambèu;  
Sus mount, pèr plano e pèr valengo  
A mes en glòri nosto lengo;

Enlumina coume un missau,  
Es nosto biblo, e l'evangèli  
Qu'a 'scri pèr nautre lou Vergèli  
De l'umanisme prouvençau.

Pèr metre fin à l'aventuro  
De sa sublimo creature,  
D'un fiò d'amour trop bèn nourri  
Lou Maianen la fai mourir.

Mai proun de gènt digne de fe,  
Pèr l'aguè visto manto fes  
Tant pèr ciéuta coume pèr orto,  
Dison: — Noun, Mirèio es pas morto.

D'ùni l'an visto à Sant-Roumié,  
Lou bèu païs de Roumanijo;  
Di bourtoulaigo e garanié  
Tenié culido la graniho;

E l'an visto de-vers Seloun;  
Au cagnard brulant di sebisso,  
D'uno man jamai pausadisso  
Dounavo de siuen i meloun;

S'aro vai plus culi de fueio  
Pèr apastura si magnan,  
De sis bëus age elo despueio  
Cinsau, clareto e carignan.

Fiho de paure o de catau,  
Pastrihouno o gënto masiero,  
Afeciounado e matinièro  
Fai pièi lis obro de l'oustau;

Mai la fau vèire pèr li voto  
De sant Danis de sant Amand,  
Pas trop fiero mai proun faroto,  
D'un clar belu sis iue cremant;

La fau vèire dins Lamanoun  
Lou bèu dilun de Pandecousto;  
Poudès courre à Panparigousto  
Pèr atrouva plus fin mourroun;

Au grand corso de Pelissano,  
En coumpanié d'un bèu jouvènt  
Segnourejavo puro et sano,  
Davans l'androuno de Taven;

A l' acamp de Ferigoulet,  
Ange de Diéu coume èro bello,  
Quand, lou carage risoulet,  
Desembouiaavo li Courdello;

E quant de cop, iéu que vous parle  
L'ai countemplado, en vilo d'Arle,  
Dins l'estrambord enfestouli  
De tout un pople trefouli.

Noun mores pas, obro divino,  
O, tu que Diéu faguè belèu,  
Diamant linde e perlo fino,  
Pèr que soun iue se n'en regale,  
Pèr que soun Eime se n'en chale,  
Pèr que te daure soun soulèu.  
Mai, de Mirèio e Magali,  
Se galant faire e biais poulit  
Venien, d'asard, à s'esvali,  
I Jardin que Durènço arroso  
Voudrien plus s'espandi li rosò;  
Se poudien plus luca li bello  
Istarien nèco lis estello  
Que flourisson li niue de Crau,  
E lou mirau que li barbelo,  
Se vesié plus rire li bello,  
Que sarié triste lou mirau.

## LA BELOIO

Pèr uno claro matinado,  
I'a'n parèu d'an, au tèms di nis,  
Endrajave ma proumenado  
Devers la Font de Sant-Danis;

Coume aprounchave de la sourço,  
Subran m'aplante dins ma coursø,  
E, contre un clot de roumanin  
Acampère un óujet menin.

Raro, curiouso, magnifico,  
Ero uno fibulo antico,  
En brounze noble e patina,  
De man de mèstre façouna.

Soun arc, capoucho minusculo,  
Ressemblo proun à la cupulo  
Que tèn sarra dintre si flanc  
L'ouvale lisc d'un bel aglan.

D'aquest bijout, li formo puro  
S'embellison de gravaduro;  
Uno denturo de festoun  
I'é fai un orle galantoun;

Sus chasque festoun, briho e tranco,  
D'esmaut fin uno perlo blanco;  
Aquéli perlo, en soun mitan,  
N'en sarroun d'autro, bello autant,

De coulour, bluio, vivo e fino  
Autant que d'ieu de cardelino;  
Pièi, que lou fai mai que poulit,  
Au centre, un làpis-lazuli.

Sabe pas s'èro bruno o bloundo  
E vivo e lindo coume l'oundo,  
E bello autant coume lou jou,  
La que pourtavo aquéu bijout;

Sabe pas s'èro Sarrasino,  
Ligouro, Grèco vo Latino;  
S'èro la fiho d'un catau  
Vo la chato d'un umble oustau;

Que m'enchau... se ma farfantello  
Me la fai vèire puro e bello  
Dins tout lou flar de soun printèms,  
E iéu fuguèsse de soun tèms.

Em' acò, d'un fado antico  
Se pièi l'uiado benefico  
Me fasié remounta subran  
Lou flume Tèms, de dous milo an;

E vouguèsson, dono Fourtuno  
Que sameno lou blad de luno,

Vo simplamen lou bel asard,  
Qu'atrouvèsse aquelo obro d'art.

A l'istant que la fouligaudo  
E belugueto garrigaudo,  
La perdiguè dins lou campas,  
Lèu e lèu estirant lou pas,

La sounariéu: — Gènto ninoio  
Vènes de perdre la beloio  
Que ti sen fièr tenié rejoun  
En sa caudo e douço presoun;

E la veici, jouino fadeto;  
E se vos bèn faire pauseto  
Tant soulamen un moumenet  
Sus l'atalus dóu caminet,

Rajustarai, sènso te pougne  
Lou gai desordre de toun jougne  
Pièi, l'alen un pau retengu  
Dins moun pitre proun esmougu,

Apoundriéu: — Folo mignoto  
Fau avé tèsto de lignoto  
Pèr ansin perdre dins lou gres  
De meraviho d'aquéu pres;

Pariero fauto, en counsciènci,  
S'amerito uno penitènci;  
Mai, se t'agrado, te dirai  
Qu'en part me tu iéu la farai;

Agouni-sié que mau i'é pènso!  
Vole ges d'autro recoumpènso;  
E s'i jalous acò desplais  
Ma resoun i'é ves rèn de laid!

Sus l'arc divin de ti bouqueto  
Qu'à moun envejo fan lingueto,  
Vole culi tant de poutoun  
Que ta beloio a de festoun.

## LI MEISSOUNIE

Eron sèt bèu jouvènt, courba sus li andano,  
A l'uscle de l'estieu meissounant de soulèu;  
A li vèire, li gènt se pensavon belèu,  
Que perdien sa susour pèr uno obro bèn vano;  
Mai éli, dins l'uiau e l'arc de si daioun,  
Culissen à plesi si garbo de raioun,  
Countuniavon, galoi, sa meissoun de bèuta;  
De soun regard d'eigloun, lou qu'ero de Maiano,  
Alucavo déjà vers l'inmortualita.

Un jour que s'envenien, sa batudo coumplido,  
Au castèu de la Font, que ié tenien counsèn,  
Capiteron, si pas — oh! lou poulit moussèu! —  
A l'orle dòu camin, la Coumtesso endourmido.

Sa sorre, ço qu'an di, à la flour de sis an,  
Iaguènt escamouta si titre de noublesso,  
Elo, se plaiseguent permié li païsan,  
Sènsø mai de resoun s'èro facho pastresso.

Rusticant e gardant, li roumias dòu camin,  
Avien jour après jour espeandra sa raubo,  
Mai d'elo, à chasque fiéu que l'espino derraubo,  
Resplendissié que mai lou moulage divin.

Em' acò tout-d'un-tèms li sèt l'an couneigudo;  
Elo, un pau souvajouno, èro proun esmouugudo  
Quand i'an di, li jouvènt 'mé nautre vène lèu;  
Vène, que te rendren ta raubo de soulèu.

Mais quand li meisounié, pèr counfirma soun dire,  
Aguènt à brand durbi li porto dòu castèu  
I'an rendu de Coumtesso e courouno e mantèu,  
La bello, quatecant a retrouba soun rire.

Eron sèt meisounié, courba sus lis andano,  
Adoubant dins la gau soun obro de béuta;  
Sus sis alo d'eiglas, lou qu'èro de Maiano,  
D'un vanc lis empourtè vers l'inmortalita.

## A SANT-ROUMIE

Bèu Sant-Roumié salut! gènto e claro ciéuta;  
Coume un roure poujant founs e luen si racino,  
Tu qu'apereilalin bousques ti ourigino  
Au sen d'uno courouso e noblo antiqueta;

Tu que vuei fas briha au grand soulèu latin  
Cougredaire divin de la lindo pensado,  
Dins Glanum la Gregalo enfin desacatado,  
Li relicle tant pur de ti proumié matin.

Quand l'Europo mejano à peno desneblado,  
Dòu soulèu prouvençau bevié l'escandihado,  
Sus ti bèu serre blous, melicous e menin,  
Ta Faneto apoundié lou flar de Roumanin,

E quoaro après un som de mai de cinq-cent an,  
La Coumtesso endourmido enfin levè li ciho,  
Se saup qu'es à la voues di prince païsan  
Que ié dison Mistral e Jousè Roumaniho;

Quouro enfin, ourquestrant de la gènto masiero,  
Li gau e la doulour e la douço preguiero,

Au rire di flahut, au plagnun di vióuloun,  
Gounod fasié canta l'amo de ti valoun.

Mai se pèr lou menu devian dire ta gèsto,  
Un espés cartabèu nous sarié pas de rèsto;  
E ti fiho e ti chat aubourant toun penoun,  
Vuèi enca porton luen la glòri de toun noum.

As pèr ajoucadou lis Aupiho embaumado,  
Pèr tapis, à ti pèd, de flour milo saumado,  
I matin triounflant s'esviho ta bèuta,  
La glòri di tremount dauro ta majesta.

Tambèn, se quauque jour, au just de l'archimbello,  
Fasèn un paumarés di vilo e dis endré  
Que pòu s'enorguli nosto Prouvènço bello,  
Uni joio d'ounour te revènon de dre;

Pamens s'à ta courouno, o rèino de l'Aupiho,  
D'asard o pèr oublit mancavo un diamant,  
L'atrouvarian escrèt, dins lou belu cremant,  
Qu'esbribaudo, tant pur, au regard de ti fiho;

Car soun, o Sant-Roumié, de la raço classico  
Que dóu grand Fidias empurè lou flambèu  
E que, i'a milanto an, i mountagno d'Atico,  
S'enracè me li diéu pèr encarna lou Bèu.

Dicho à Sant-Roumié pèr l'inaguracioun dóu mounumen à Roumaniho.

## LOU DESTIN DE PROUVENÇO

*Il y a une vertu dans le soleil.*  
Lamartine.

Quand regarde eilalin, au soulèu de l'Istòri,  
L'ande meravihous de nosto lengo d'or  
Gravado dins lou tèms miés que dins li grimòri,  
Iéu me dise: — Parla, tradicioun e memòri  
Fau que siégon quicon de testard e de fort!

Quouro entènde, après mai de quatre milenàri,  
Li pastre dis audiho e li pelot de Crau  
Faire clanti li mot qu'autre tèms, dins si bàrri,  
Cridavon li Ligour, embarrassant soun bestiàri,  
Is age frust, qu'eron de pèiro li destrau;

Quand l'aire linde e blu de noste bèu terraire,  
De Saut à Mas-Tibert, de Vènço à Sant-Roumié,  
Brusis di mèmi son qu'au tèms dis Emperaire,  
Iéu sounge emé fierta: — Lou parla de ti paire  
Di paraulis latin neissiguè bèu proumié!

E dise i desmana, dise i bastard de raço,  
Que noun sabon quinca foro dóu franchimand  
E pertout van disènt que nosto lengo passo,  
Que neste Felibrige es parpello d'agasso  
E que, s'es panca mort, lou sara proun deman...

Vous enganas, messiés, la lengo mespresado,  
La veires pas deman à soun darrié badau,  
E cabusso panca dis auturo embaumado  
Ounte, d'un même vanc, ensèn l'an aubourado  
La divino masiero e lou fièr Calendau!

E se lou vesen vuei, neste antique lengage  
Cava sempre mai founs l'amo dóu terradou,  
Mau despié lis afront, s'esperlounga dins l'age,  
Engusco dóu malur tirant soun avantage,  
Fèni respelissènt de soun empuradou;

Pèr fin d'escounjura la terriblo escasènço  
Dóu chapladis finau que guèiro li nacioun,  
Quau vous dis pas que Diéu a marca la Prouvènço,  
Pèr crida sus un monde en pleno descasènço  
Un cant tout de lumiero e de freirejacioun?

E, parlado belèu dintre l'Europo entiero,  
Quau vous dis pas qu'un jour, nosto lengo d'amour,  
Clau misticò durbènt li cor e li frountiero,  
Pertout fara mirando e ié faran cachiero,  
Coume i siècle daura de nòsti troubadour?

Alor, n'aguènt ausi la musico divino  
Li pople encaro fèr s'amansiran belèu,  
E, chourlant l'estrambord à la Coupo latino  
Cantarán dins la gau lou mot de Lamartino:  
— I'a 'no vertu dins lou soulèu!

## I FELIBRE DE LA CRAU

Ere proun luen d'Eiguièro en aqueste dimar  
Qu'avès, un cop de mai, pèr festea sant Marc,  
Adraia vòsti pas dins li piado di rèire,  
Vers lis oumbrage astra dóu vièi mas de Sant-Pèire;

Ere luen... e pamens ère pas sens regrès  
De noun pourgi ma pèiro au mounument escrèt,  
E de noum èstre en part à la felibrejado  
Ounte devien clanti cansoun e galejado;

Oste pèr quàuqui jour dóu païs Biarnés  
Ounte soun femo bello e mountagnard courtés,  
Sourtian de vesita lou castèu d'Enri-Quatre  
Quand vòsti cor, ami, d'estrambord devien batre.

Lou tèms s'èro esclargi devers li Pirenèu,  
Qu'i poutoun dóu soulèu s'èron desacatado;

Dis espalo de Diéu, blanco ermino esquihado,  
Esbrihauvado amount la tafo de la nèu.

Enchuscla de plesi, badavian lou relarg,  
Que dóu Gavo que rounco i cimo vierginènco,  
Dins un chale divin emporto lou regard,  
Di coumbo vapourouso i resplendour nevènco;

Jamai las, miravian, di serre, di calan,  
La cadeno sens fin, beluguejanto raro  
Que dóu vièi païs d'O, auturouso, separe  
Mountogno d'Aragoun e vergié Catalan;

Pourta pèr lis embrun, dins la lus e lou vènt  
Mountavo un cant reiau di garagai mouvènt;  
Nous autre, pivela pèr lou trelus di cimo,  
N'en bevian, amudi, la vesioun sublimo.

Alor, dins la fervour de moun trefoulimen,  
Sus lis alo dóu bèu moun amo traspourtado,  
S'envoulant vers Eigièro, amistadousamen  
I'é venguè saluda vosto bello acampado.

A Pau, 25 d'abriéu 1951.

#### A-N-AGUSTE PERRET

Toun carage auboura peramount, vers lis astre,  
Toun amo s'emplanavo en un raive esperdu,  
Un raive que se tèn dóu coumun escoundu,  
Soulamen caligna di pouèto e di pastre.

Di resson d'antre-tèms ferverous escouaire,  
De la terro meiralo armounious troubaire,  
Gilouso emai Riboun an sauva de l'oublit  
Sa legèndo daurado e si conte poulit.

Furnaire saberu, ta quisto jamai lasso,  
De l'age di peirard i faste emperorau  
A sachu destousca li terme mounte passo  
La gèsto dóu païs en soun camin reiau;

Dis aujòu rude e fièr desacatant li traço  
Jasènt souto lis erme en soun lié de caiau,  
Segur de i'atrrouva la grandour de la Raço,  
As fourça lou secrèt dóu tresor patriau.

## AU PINTRE AUDOUARD PERRET

Dóu som de l'ome Negre à la Crau sóuvertouso,  
Pèr canta lou païs sus lou tème de l'Art,  
Ta vesioun s'engranjant au garbo souleiouso  
Cinquanto an à-de-rèng meisounè lou relarg.

D'en proumié, fiéu devot, em' un ur benastra,  
Dins si porto e si font, si planet, si carriero,  
Empura de l'amour qu'aviès pèr toun Eiguièro,  
N'en as fa l'agradiéu e luminous retrá.

As di l'argelas d'or e l'oulivié d'argènt,  
Lou petelin que sauno au flanc di Cadeniero,  
La flour de l'amelié qu'assieuno la coustiero,  
L'èure que de Gilouso aparo lou sourgènt.

As fa clanti la gau di matin triouflant,  
Daurant de Mount-Menut l'esquino chimarado,  
As sesi li tremount de sang e d'or, couifant  
D'uno glòri de fiò lis Aupiho estrassado;

Mant un cop dins ta miro as prés lou Castelas,  
Grand rapace empeira, rude e ferouge aiglas,  
Vièi guerrié matrassa, qu'en silènci pantaio  
Bèlli dono, tournés, court d'amour e bataio;

Ansin, dempièi Braïs fin qu'à Roco-Martino,  
I counfin dóu terraire alargant toun prefa,  
Enjusqu'aro Perret, res coume tu n'a fa,  
Sus la tèlo, flouri sa lumiero latino.

## FLOUR

Pèr Aguste Saurel que cantè Marò-Roso.  
Quand erian pichotet, Saurel, te n'en souvèn,  
I relicte de flour jogavian proun souvènt;  
Espelido dóu jour, candido, vierginello,  
Di roso dóu jardin culissian la plus bello;

Pièi, emé devoucioun, lou cor tout esmougu,  
En un rode chausi e de res couneigu,  
Dins terro la metian, acatado d'un vèire,  
E, l'endeman, courian lèu e lèu la revèire;

D'un poutoun de soulèu, belamen irisado,  
La flour nous pareissié coume divinisado...  
E d'acò ni avié proun pèr ameisa la fam  
E bressa lou pantai de nosto amo d'enfant.

Mai tu, moun bel ami, la flour qu'aviés chausido  
Dins la glèiso d'Eiguièro, un vèspre Calendau,  
Lou jardinié divin avans tu la culido  
Pèr fin de n'en flouri si jardin d'Amoundaut.

Mestrejant toun mau-cor pèr miés dire ta peno,  
Ourdounant toun plagnun en estànci perenno,  
As enchassa ta Roso en un riche veiriau  
D'ounte elo te souris coume dins un mirau;

E nautre la vesen trevant li Sànti-Lèio,  
En douço coumpagnié de Nerto, de Mirèio;  
E nous semblo, responso à ti vers cantadis,  
Ausi de dous murmur venènt dóu Paradis.

#### AU POUETO MANOUNEN ALEISSANDRE PEYRON

Tis aujòu, o Peyron, pèr li voto vesino,  
En fiò d'art de coulour ufanouso nourri,  
Mestrejavon la poudro e la fasien flouri;  
E tóuti de crida: — Osco pèr Cardelino!

Mai tu, pouèto fièr, es dóu sang de toun cor,  
Es de l'empuramen ferouge de toun amo,  
Cantan soun alegrìo o cridant soun mau cor  
Que faguères giscla de belugo e de flamo;

E se, dóu jo sabènt d'aquéli fiò d'estiéu,  
Di soulèu e di font li flambour escampado,  
Autant lèu touca terro èron pièi amoussado,

Lis estello eissamant de l'embrasamen tiéu,  
Lusiran dins milo an, ardènto e vivo, talo  
Que d'uno amo en coumbour giscleron inmourtalo.

Li parènt, emai li rèire d'Aleissandre Peyron èron d'arteficié de grand renoum.  
Cardelino èro soun escais-noum.

#### AU MAJOURAU RAVOUS ARNAUD

En estènt que pèr tu, dins si aromo escrèt,  
Ami, l'amo di flour n'a gaire de secrèt,  
S'endevèn que chasqu'an nous dises bono annado  
De maniero flourido e fruchouso e granado;  
Après la fino isopo e lou blu roumanin,  
La vióuleto, la rosò e lou clar jaussemin,  
Lou sàuví benefique emai la ferigoulo  
Que pèr ana dourmi nous laisso bono goulo,  
Toun amista, veici que nous pourgis encuei  
Toun galant brout de cabri-fuei,

Flour que damo naturo en soun divin caprice  
N'en a fa tant poulit aguioun e calice,

E que, l'estiéu vengu, cabreto e cabretoun  
Se n'en lipoun, groumand, barbicheto e mentoun.

Ravous, en maridant sciènci e pouësio,  
Tu, dis amaro-pan n'en fas uno ambrouusio  
Qu'en sis aromo vouladis  
Semblo veni dôu Paradis;  
E, d'Avignoun enjusqu'à Vèneço,  
I quatre caire de Prouvèneço,  
A z-Ais, en Arle, em' à Seloun,  
A Marsiho, Niço, Touloun,  
De Sant-Roumié fin qu'à Manosco,  
Ti vièi coumpagnoun, cridan osco!  
De saran tóuti coungousta  
De toun message d'amista.

E iéu, de moun maset, entre Crau e Durèneço,  
De vint an de freirié gardant la souvenèneço  
Vole te dire eici  
Lou plus courau di gramaci  
Acoumpagnan mi vot  
Li miés senti, li mai devot,  
Perfin qu'en l'an nouvèu tout aro à l'espelido,  
De jour flouri de gau fagues bello culido;  
Diéu te baie à souvèt alegrío, santa,  
De corps e d'esperit pleno felicita;  
Que pièi, roumiéu fidèu an rampèu de Daiano,  
Se retroubèn gaiard is acamp de Maiano,  
E longo-mai Ravous, noun mandes à plesi,  
Ti flour gènto, gansado au fiéu de ti lesi.

## A GRABIE ISOARD

Ai destria quauque soucit  
Dins la pourido bono annado  
Qu'amistadouso m'as mandado;  
Te pourgisse la miéuno eici:

— Vo, moun bèu, lou tème fuso vite,  
E coume tu crese necite,  
D'amira proun seriousamen  
Lou finau mounte debanen;  
Mai à Diéu fau faire fisanço,  
Qu'es tout amour, tout esperanço;  
Subre-tout, quouro, coume tu,  
Sens trabuca, la vido entiero  
L'on a segui, dins l'endrechiero  
Lou clar draiòu de la vertu.

E pièi, Grabié, se me vos crèire,  
Nous soubro enca proun tème pèr vèire  
De mant acamp amistadou  
Li clar soulèu avenirou;  
Dins l'estrambord di taulejado  
E l'envanc di felibrejado,

Tira de nòsti vièi cabas  
Isto proun viéure à n'acaba;

Ah! segur... lou bon Diéu coumando,  
Fau aceta ço que nous mando,  
E longo-mai en sa bounta  
Nous baie gau emai santa.

En esperant lou paradis  
( Mai pèr l'ouro acò presso gaire ),  
En Santo-Estello, afouga targaire,  
Resten alegre e cantadis.

## A DONO ESTEFANETO

A la vihado, emé Nineto,  
Ai relegi, dono Faneto  
Lou tant eimable coumplimen  
Au pantaiaire Manounen;  
Aqueло dicho touto gènto,  
Pèr Savoio forço indulgènto,  
Li counvivo, qu'en amista  
Emé nautre an bagna lis alo  
E li mirau de la cigalo  
S'en saran tóuti coungousta.

Fin e grana coume dragèjo,  
Riche de formo emai d'idèjo,  
Voste trouba tant bèn vengu  
Qu'ai escouta proun esmougu,

A reviéuda li remembranço  
Dóu bèu Calès de nost' enfanço,  
E si grand pin armounious  
E si recate souleious;

Ah! paure... coume lou tèms fuso,  
E toujour lando e jamai muso,  
E la vido vai s'escoulant!...  
Mai de la Crau, lis Escoulan

En nous durbènt à brand si porto,  
An respeli lis ouro morto,  
Lis ouro claro d'autre-tèms,  
Qu'an encanta dins soun printèms

Nosto jouinesso benurouso  
E jogarello e luminouso;  
Ouro daurado que nous fan  
Retrouba nosto amo d'enfant.

## A JOUSE D'ARBAUD

Lou siècle èro espeli; jouine e fort, toun Lausié,  
Dins li bano dóu brau e sa noblo arcaduro  
Ourdounant lis accord d'uno liro tant puro,  
Au grand soulèu de Diéu butavo e flourissié;

Pièi ta Bèstio i pèd fourc emai ti Cant Palustre  
Au parla camarguen dounavon tout soun lustre;  
Enfin, lou Cor Barra e li Rampau d'Aram,  
Qu'ei siècle avenidou longo-mai clantiran.

Ansin, quand plouravian i clar de la Daiano,  
Quand l'amo de Mistrau acabant soun andano  
Prenié formo inmourtalò i Pountin Aliscamp,

Abrivant dins l'azur ta Pegaso gardiano,  
T'auren vist teni tèsto à l'Aiglo de Maiano,  
Pèr lou flar de toun verbe e l'amplour de toun cant.

1974.

## ADIEU AU JAS

Alor, dins pas longtèms, pèr anan viéure eila,  
Es verai ço qu'an di, bèu Jas t'anan leissa!...  
Quand perfés ié pensan, à nòsti cor sensible,  
Acò, sus lou moumen sèmble gaire poussible;  
Vièi Jas qu'amavian mai qu'un riche soun castèu;  
Tu que dempièi tant d'an estendiés toun mantèu  
    Sus li jouine e li vièi d'uno grando famiho  
    Coume dessus un nis un aubre sa ramaho;  
    Bèu Jas, ana leissa toun antique fougau  
    Que l'ivèr nous baiavo e sa flamo e sa gau;  
    La chaminèo grando e la vasto cousinò,  
Qu'amavian tant, toujour pimpanto de caussino  
    E mounte l'ounce Pau vuejavo lou pastis...  
    Vièi Jas, anan leissa ti granjo, tis óutis;  
    Anaren plus 'campà lis iòu emé Meirino  
    Ni coumta dins si nis li pichot di lapino;  
    Garda pèr lou Papet, souto soun amouré,  
    Faren plus dins toun prat cènt e milo foulié;  
    Nous veira plus, amount au cagnard di pinedo,  
    Courseja li cabreto e taquina li fedo.  
    Mai de tu gardaren un tant clar souveni,  
    Qu'en pensado souvènt nous veiras reveni,  
    E quand l'ivèr toun fiò fara canta sa flamo,  
Jas!... escouto... sara la cansoun de nosto amo;  
    Pièi, coume nòsti gènt, de tu rèston vesin  
    E que, pèr sucessour auras nòsti cousin,  
    Vers éli voulountié vendren turta lou vèire,  
    Ansin auren souvènt la gau de te revèire.

Glaude, moun fraire, e iéu gardaren tóuti dous,  
De noste bon vièi Jas un souveni tant dous  
Que restaras toujour dins nosto remembranço  
Lou bèu rai de soulèu que daurè nosto enfanço.

## LOU GRAND MALASTRE

### I

Quand visquèsson milo an, li jouvènt e li vièi,  
De tu se souvendran, febrié cinqanto sièis!...  
    Jamai oublidaran lou vènt de Siberio  
    Subre lis ort maca escampant sa furò  
    Emé d'ourlamen tau qu'aurias de zoulou  
Davans èli couchant de chourmaio de loup...  
    Jamai óublidaran la terriblo estanaio  
De la fre, estranglant aubre, flour, ourtoulaio,  
    Fasènt à mort soufri aucèu, bestiàri, gènt;  
    Acabant li malaut, tuiant lis endigènt,  
Bloucant de bord en bord flume, canau, ribiero,  
    Counéissènt ni quartié, ni païs, ni frountiero;  
    Gabian, canard e péis jala dins lis estang,  
    Pin, platano, óulivié fendu pèr lou mitan;  
    Jamai óublidaran la terro un mes barrado,  
Avans d'avé 'spiga, li meisoun meisounado,  
Quand visquèsson milo an, febrié cinqanto-sièis,  
    Noun poudran t'óublida li jouvènt e li vièi!

### II

Lou fau dire, pamens, talo desoulacioun  
Pèr nautre noun fuguè senso counsoulacioun  
    E, pas pulèu Paris aguè vènt dóu senestre,  
    Di labour e pasquié s'acampè lou Menistre,  
    Vengu rassegura neste despartamen  
Dóu recounfort verbau de soun gouvernamen,  
    E qu'em' un bèu discours plen de soulicitudo  
Vouguè bèn de l'Estat nous proumetre l'ajudo!...

### III

Mai Chanu, moun vesin, m'a di: — Parié discours  
S'apello en franchimand: eau bénite de cour...  
    Moun ami lou Chanu es un vièi de la vièo;  
    Es pas toumba, segur, de la darriero plueio;  
    Apound: — Pèr crèire acò, i'a que li bartavèu  
    Qu'an un pessu de bren en plaço de cervèu.  
    E, sènsò me leissa lou tèms que ié rebrique,  
Repren: — Farai pas long; espèro que t'esplique.  
    Un ami de toujour, qu'a pèr noum Jacquemus,  
    Poussedo un galant mas en terraire de Mus.  
    Se l'endré, proun quiha, à l'óulivié reguigno,

Ié venon mai que bèn lou blad coume la vigno.  
L'ome, proun engaubia, mestrejo soun gouvèr;  
Meno, coume un jardin si plantié de gros-verd.  
    Mai, i'a d'acò tres an, uno terriblo grèlo  
    Embriguè si rasin, escrachè si tousello...  
    Aguènt dins li delai fa sa declaracioun,  
    Set e vue mes après reçaup l'envitacioun  
    De s'ana presenta au percetour de Gordo  
    Pèr se faire paga sa perdo de recordo;  
    Perdeguè pas soun tèms e, pèr lou dire franc,  
Se garcèron pas d'eu... Touquè cinquanto franc.  
    I'anesse cum jambis, li pèd dins si soulié,  
    N'aurié just agu proun pèr li fres de groulié.  
    Mai, pèr n'en reveni à l'atuau malastre,  
    Ai pas la pretencioun d'estre Nostradamus  
    E sabe pas legi l'aveni dins lis astre.  
    Toucaren enca mèns que l'ami Jacquemus!  
E, se vos saupre au just lou founs de ma pensado,  
    Pèr tant qu'aguen soufri d'aquelo mau-parado  
    Fau s'estima countènt se nous fan rèn paga...

#### IV

Coume lou regardave, un pau estoumaga,  
Eu countùnio, serious: — Ma resoun, à tout prendre,  
M'un pau de refleicioun es eisado à coumprendre;  
    Au dire di journau, aquelo caravano  
    Qu'escourriguè tres jour pèr auturo e pèr plano  
    Pèr juja di degai dins lou despartamen,  
Coumtavo, à çò qu'an di, trento veituro au mens;  
    La taulejado à-z-Ais à l'Oustau de Rènié,  
    L'essènci, li caufaire e si frès de panié;  
    Pèr fin d'enregistra nòsti declaracioun  
    Tout lou travai fourni pèr l'Amenistracioun  
    Que, talo lou ratun amo li paparasso  
    E se plaisir à pigna li parpello d'agasso:  
    Tout eiçò apoundu fai un mouloun de frès!  
Faudra trouva quaucun pèr n'en paga lou près.  
    Coume, tout bèn pesa es pèr l'agriculturo,  
    Es nautre, païsan que devèn la faturo  
    E dins gaire de tèms, veiras, lou percetour  
    Nous la presentara sènsa trop de countour!...  
    Emai l'ami Chanu siegue proun garcejaire  
    Siéu pas liuen de pensa que se trompavo gaire.

#### V

Mai seguissen lou fiéu d'aquest raconte amar;  
Plouguè sens decessa li trento-un jour de mars;  
    Un vièi pastre m'a di, qu'es pouèto à sis ouro:  
— Li gènt crèson que plòu... es lou printèms que plouro.  
    Lou printèms, quand a vist triste e mut lou valoun,  
    Li tepu sènsa flour, li pin sènsa auceloun,  
    Quand n'a trouva pertout en fa de benvengudo  
        Que silènci mourtau e morno soulitudo,  
    Quouro a vist mai que mai lou campèstre endeca,  
        S'es aplanta inquiet, sounjarèu e neca...

Alor, d'un vièi pinas davalant li brancasso,  
I'an di, venènt vers éu, uno coublou d'agasso.

## VI

— Arrives, bèu pichot, o bèn tard o trop lèu!  
S'encaro aviés pensa d'adurre lou soulèu!...  
Que n'en dises, mignot, fai pas gau lou terraire,  
Li jardin fan pieta, li prat verdejon gaire...  
E li colo, Diéu grand! èuse, mourven e pin,  
Vès lei... sèmblo-ti pas qu'an agu lou charpin!  
Mai es pas tout aqui... se vesiés li coustiéro,  
D'Arle enjusqu'à-n-Ourgon, en passant pèr Eiguero,  
Dins aquéli quartié, la naturo fai pòu,  
E de tout ço qu'es mort sèmblo que porto dòu!...  
Despièi cent an e mai nosto bello encountrado  
N'avié pas rebouli de tant duro estribado!...  
Lis óulivié soun mort e veiran plus, li gènt,  
Lusi sus li bancau soun fueiage d'argènt.

## VII

Segur, fai lou Printèms, la nature es bèn tristo,  
Mai ço que sobre-tout, iéu lou mai me countristo,  
Es que adès, en arrivant dins lou valoun,  
En liò n'ai entendu canta lis auceloun...  
L'an passa, m'en souvèn, si milo voues mesclado,  
Pèr festa moun retour me dounèron l'aubado.  
— Ti bèus iue van ploura, mignot, d'Arle à Seloun,  
Coume lis óulivié, soun mort lis auceloun...  
La fre, la nèu, la fam, li niue longo e marrido  
A cha milo an tuia quinsoun e bouscarido;  
Nous an meme afourtì qu'es mort de perdigau!  
Soun mort li cardelin. Emai lou fin rigau,  
Que semblavo un moussu dins soun courset de flamo,  
Au bon Diéu dis aucèu a rendu sa bello amo...  
E nautre, paure bèu, se sian encaro eici,  
Pèr te lou dire franc, ei segur doumaci  
Qu'en soun amour meirau, l'abelano Naturo  
Nous baiè tout ensèn plumo caudo e pèu duro.  
Acò di, li margot s'envoulant vers soun pin  
Leissèron lou Printèms soulet 'mé soun pegin,  
E d'ouro emé de jour emai de jour encaro,  
La terro s'embuguè de si lagremo amaro.

## VIII

Alor, la Terro Maire aguènt begu si plour,  
S'esmouguè tout-d'un-tèms de tant vivo doulour,  
E, de soun sen maca, uno espouncho amourouso  
A buta tournamai li sabo generouso...  
Lou campèstre renais; un pau pertout dejà,  
I poutoun dòu soulèu se vèi reverdeja.  
Urous d'avé escapa à l'amplour dòu malastre,  
Sus lou gara tubant courron li galapastre;  
Galoï, lou chichi-bu cantavo aquest matin;

Tournamai lou rousié verdejo sus l'autin,  
Di cereisié farot, la drudo e longo tiero,  
Desfourelant lèu-lèu sa raubo printaniero,  
Plus bello que jamai, belèu, a reflouri!...  
Alor, enfant gasta counsoula pèr sa maire,  
Di chatouno e di flour urous poutounejaire,  
I bèu jour revengu lou Printèms a sourri.

Di en Eiguero au Mas de la Patouiardo pèr Sant-Marc 1956.

### L'AMO DOU VIN

Un jour lou vin galoi cantavo dins la coupo:  
— Ome, mande vers-tu, ange deseireta,  
Bèu coume sang de vendemiaire que se coupo,  
Un cant plen de lumiero e de fraternita;

Ami, sabe quant fau, sus la coustiero en flamo,  
De peno, de susour e de soulèu coussènt,  
Pèr dintre li peirard faire giscla moun amo,  
Tambèn, pèr ma vertu te sarai benfasènt;

Siéu urous coum' un diéu quand ma raiado toumbo  
Au galet d'un pacan, pèr lou travai gausi;  
Pèr iéu, soun pitre caud es uno douço toumbo,  
Au respèt de la niue di grands inde transi;

Emé tu cantarai dins la gau di riboto;  
Moun rire clantira dins tis acamp festiéu;  
Emé tu dansarai dins la fèbre di voto,  
Tóuti mis estrambord, fraire, saran li tiéu;

Flourirai lou regard de ta femo ravidò;  
A toun fiéu dounarai alegriò e coulour;  
Pèr que fugue vincèire i lucho de la vido,  
Soun sang, l'empurarai de ma forto calour;

Dins tu m'espandirai, souleiouso ambrousiò,  
Rai divin escapa di celèste fougau;  
Fiho de nostre amour, la santo pouësiò  
S'envoulara vers Diéu en belugo de gau.

( Revira de Baudelaire. )

## A-N-UNO FLOUR

De que me vos caro floureto,  
Eimable e charmant souveni,  
Quàsi morto, e pamens couqueto  
Fin qu'à iéu quau te fai veni?

Dins aquesto orvo agouloupado  
Vènes de faire un long camin,  
De que t'an di li det menin  
Que sus la brancho t'an coupado.

Siès-ti qu'erbihò dessecado  
Que vèn acaba de mouri,  
O toun sen lest à reflouri  
Escound encaro uno pensado.

Ta flour, pecaire, à la candour  
De l'inoucènto desoulanço,  
Mai de la cregnènto esperanço  
Ta fueio porto la coulour.

As-ti pèr iéu quauque message?  
Vai, pos parla, sarai discrèt;  
Es-ti ta verduro un secrèt,  
Toun perfum a-ti soun lengage?

S'acò 's ansin, parlo me bas,  
Misteriouso messagiero;  
Se vai d'aure, respondes pas,  
Dor sus moun cor fresco e laugièro.

Counèisse trop li det menin  
E soun estè plen de caprice  
Que d'un bout de fiéu souple e fin  
An nousa toun pale calice;

D'aquelo man, n'en siéu segur,  
Ni Fidias ni Prassítèle  
N'aurien pouscu trouva la sur  
Qu'en prenènt Venus pèr moudèle!

Es douço, blanco emai fidèlo,  
Franço, se dis, e mai enca;  
Quau prendrié poudé sus elo  
Tout un tresor pòu destousca.

Mai elo ei sajo e proun sevèro;  
Quauque auvàri pòu m'arriba,  
Floureto, cregnèn sa coulèro,  
Digues rèn!... laisse me rava.

( Revira d'Alfred de Musset. )  
1970.

## A EVO

Tu sies l'obro primo e calino  
Que lou Sartre au divin cisèu  
Faguè 'speli, souplò e felino,  
D'uno careso de soulèu;

Tu siés l'anforo miraclouso,  
Siés lou calice de la flour,  
La formo agusto ounte nouso  
La grano eterno de l'amour.

I clar matin de toun printèms  
Naivo e puro siés Mirèio  
Que desbartasso pèr Vincènt  
L'aspre camin de l'Empirèio;

Auturouso e pivelarello  
Sus li trecòu sies Esterello;  
Vers ta counquisto, Calendau  
Escalara toujour plus aut.

E siés l'Angloro au fin carage  
Qu'à l'aventuro se gandis  
E vers la lèco dóu mirage  
Emé soun Dra s'aproutoundis;

E siés tambèn Nerto la bloundo  
Nargant Cifèr e si boufet  
Que, sens cregne sa facho inmoundo,  
Subre lis alo de la fe,

Dóu Banu desnousant l'entrigo,  
Dins un envanc esbleugissènt,  
T'envoles, enmenant Rodrigo  
Vers li trelus paradisen.

Douço flour de la gèsto antico,  
Sorre piouso e magnifico,  
Siés Antigouno, e de toun rèi  
Afrountès l'iro emai la lèi.

Au sèr tragi dóu Golgota,  
Deguè sauna tour cor de Maire,  
Vesènt mourri entre douz laire,  
Lou Diéu que toun sen a pourta.

Ansin, de milo e cènt pouèmo  
Eternamen siés lou grand tèmo;  
Dins l'alegrio o la doulour  
Siés la preïresso de l'Amour.

## NOUVEMBRE

L'estiéu a vira court; gaiard e magistous  
Bacus a vendemia sus soun càrri moustous;  
Di galoupin óutobre a vueja li carriero;  
Fugissent vitamen davans li nèu proumiero,  
Lis escabot, superbe an davala d'un saut  
Vers li jas, li coussou, li paisse prouvençau.  
De sieis mes veiren plus l'iroundo aprejoulido  
Estrassa lou cèu blu d'arabesco poulido.  
Alor, tau Galipan, coursejant à grand pas  
Li mourre, li valoun, li jardin, li campas,  
Trapejant sens vergougno un tapis de plóuvino,  
Au travès di prat verd e di rousso champino,  
De pourpro e d'or vèsti, ufanous coume un rèi,  
Rouito i gauto, Nouvèembre un fres matin parèi.

Li ninfo di valoun, di sorgo, di ribiero,  
Qu'afeciounon, l'estiéu, l'oumbrun e la fresquiero  
E que trevon de niue, li pargue di castèu,  
Dóu sang dis alicant e de l'or di piboulo  
Pèr ié para la fre quand la biso gingoulo,  
An teissu pèr Nouvèembre un superbe mantèu.  
Mai, pecaire, deman, plóuvino emai cisampo  
Faran milo pedas au grand mantèu de pampo,  
E quouro, pèr de bon, l'ivèr s'acampara,  
Pauvre vièi tremoulant, decèmbre gouissara.

Nouvèembre a madura li recordo tardiero;  
Alor, femo e fihan, à l'adré di coustiero,  
Despueion vitamen, selounen, aglandau,  
De fru lisc e poupou lou fueiun argentau;  
Quihado au cavalet Mirèio ris e canto,  
E soun rire cascaio e sa voues nous encanto.  
E dins l'aire vibrant soun quiet fouligau  
Reviho sus li mourre un cant de perdigau.  
Mai veici qu'aprouch'an de Santo-Catarino...  
Dins lou moulin bèn caud, à ras bord dis eisino,  
De la pasto qu'esprimo un quicha pouderous,  
En trespir redoulènt vai giscla l'òli rous.

Mai que tóuti Nouvèembre ei lou mes di semenço;  
A la graci de Diéu, tournamai recoumenço,  
En soun ciéucle sens fin, la roundo di sesoun,  
Qu'adus pièi touto fruchò à sa maduresoun;  
Alor, lou païsan, d'erso e de barrulaire,  
De soulèu en soulèu adoubo lou terraire;  
De soun noble mestié couneissènt la grandour,  
Mesuro tout lou pres di semano e di jour,  
Que Diéu i'a counfisa, en toco proumierenco,  
De prouvesi de pan la famiho oumenèncò;  
Tambèn, quand tournara Sant-Jan lou meissounié,  
Lourdo saron li garbo e riche li granié.

Mai Nouvèembre es tambèn lou mes que la naturo  
Escampo i douge vènt sa bello vestiduro;  
Véuse de soun fourni que pèr sòu vai pourri,  
Li grands aubre doulènt, dirias que van mourir;  
Lou pougnènt aguioun di frejour proumierenco

Fai l'ome regretous di favour estivenco;  
Plueio, neblo, cisampo e laido brefounié  
Enfuson dins soun cor lagno e malancounié,  
E l'alo de la mort e soun oumbro jalado,  
Venon pièi, à moumen, ensourni si pensado.

Mai, pèr nautre crestian, li negre pensamen  
Nous devon soumbreja sus nostre entendamen.  
Coume fau que lou gran dins terro rebouligue  
Davans que l'espigau un clar matin flourigue,  
Nosto amo e neste cors eiçavau counfoundu,  
Se dèvon dire à Diéu, quand lou tèms n'es adu;  
Mistique parpaïoun au terme de sa mudo,  
Deliéuro de la car, l'amo, laugière e nudo,  
S'envolo, aucèu de Diéu, vers l'eterne sejour  
Que sens raro e sens fin dardaio sa baudour  
I fabulous jardin de l'inmènso Empireòo,  
Ounte, d'amour escrèt Vincènt brèssò Mirèio,  
Dins l'eterno jouvènço e la puro bèuta,  
Inefable atribut de l'inmourtalita;  
En prefiguracioun de talo benuranco,  
Gisclant d'un arc-de-sedo i coulour d'esperanço,  
Pèr li juste, li dous, li benvoulènt, li sant,  
Nouvèmble a pèr lindau la glòri de Toussant.

1965.

## L'OUSTAU

Sus lou relarg de gres que, fièr avans-courrière  
A l'euse, à l'agarus an disputa mi rère,  
Dins lou delai de tèms que nous èro assigna,  
Coulumplen d'un pantai de longs an caligna,

En pastouiro d'Ourgon, gravihoun de Durènço,  
Dins l'estile courrènt qu'es de modo en Prouvènço,  
Quatre mèstre-maçoun vengu de Miramas,  
I'a vint an en pau mai, bastiguèron lou mas.

Segur es pa 'n castèu; l'aven just fa proun grand  
Perfin qu'is óucasioun e fèsto de l'annado  
I'é pousguen recampa tout d'uno taulejado,  
Fiho, felen, feleno e paire e maire grand;

Pèr que posque mourga mistrau e tremountano  
E di marrit ivèr afrounta lis engano,  
Pèr lou bèn asseta, emé grand suen n'aven  
Cava lis apeoun fin qu'au turri craven;

A la vèire de luen, sa téuliso roumano  
Enregant an courdèu si tiero de versano,  
Dirias, en quaque biais, d'un celèste gara  
Pè un mèstre bouié en drechiero tira;

Es dubert is adr ; au b u proumi  matin,  
Lou raioun que banejo au cresten di mountagno,  
Avans que d u jardin ane b re l'eigagno,  
V n faire uno babeto i ros  de l'autin.

Est nt que tout maset a d' tre bateja,  
Saludant de Mistrau la recourdan o alerto  
Em  fervour chousi despi i proun t ms deja.  
L'aven piousamen douna lou noum de Nerto.

I vend ire d'engu t que r n p u desmara,  
Que i'  fai se d'asard l'us n'en r sto barra;  
Basto qu'i b us ami, manten ire e felibre  
Fugue dubert   brand, s empre aven t e libre.

L'iv r, quand nevara, rigau emai petouso  
Picaran, fisan ous,   sa vitro amistouso;  
I b u jour revengu, de Pasco   Sant-Danis,  
Iroundo e pimparrin i'  bastiran soun nis.

Em' ac  au trin-tran de la vido pacano,  
Luen dis enfetacioun e di garouio vano,  
A la gr ci de Di u i'  pousquen vi ure urous  
Dins la pas di jardin, de jour clar e noumbrous.

Mai la vido, pecaire a fusa coume un sounge;  
Nous vaquito arriba i porto d u vieiounge;  
Vers nautre, l u e l u vesen lou t ms veni,  
Que faudra soulamen vi ure de souveni.

Pamens, quouro de bon sara vengu l'iv r,  
Pousque lou souveni de n sti print ms verd  
Flameja e canta dins nosto amo ravidlo  
Coume en un vi i fougau canto uno regalido.

Pi i leissaren l'oustau... Alor, que longo-mai,  
Meme s'an  oblida quau n'en quih  lou Mai,  
Di u i  fague trachi dins sa bello jouv n o  
Li sagatun gaiard de nostro descendenco.

© CIEL d'Oc – Mai 2006